



Adresa: **Ul. H. Čemerlića 39a**
71000 Sarajevo
<http://www.voda.ba>

tel. +387 33 726-444; 726-400
fax. +387 33 726-423
e – mail: info@voda.ba

Broj: **UP-1/21-3-40-646-4/24**
Datum: **13.02.2025. godine**

«Agencija za vodno područje rijeke Save» Sarajevo rješavajući po zahtjevu pravnog lica «FAD» d.o.o. Sarajevo za donošenje rješenja o vodnoj dozvoli za ispuštanje tehnoloških otpadnih voda u prirodni recipijent sa lokacije poslovnog objekta za primarnu i finalnu obradu drveta sa pratećim objektima na osnovu člana 109. stav (1) tačka 2. Zakona o vodama («Službene novine Federacije BiH», broj 70/06) i člana 200. Zakona o upravnom postupku («Službene novine Federacije BiH», broj 2/98, 48/99 i 61/22), donosi

RJEŠENJE **o vodnoj dozvoli**

1. Pravnom licu «FAD» d.o.o. Sarajevo daje se vodna dozvola za ispuštanje tehnoloških otpadnih voda u prirodni recipijent sa lokacije poslovnog objekta - pilane sa pratećim objektima, izgrađene na zemljištu označenom sa k.č. broj 2041/2 i 2041/1 K.O. Gora, Semizovac, općina Vogošća.
2. Ova vodna dozvola ne oslobađa podnosioca zahtjeva obaveze pribavljanja saglasnosti i dozvola od strane drugih nadležnih organa, a sve u skladu sa važećim zakonskim propisima, uredbama i dr.
3. Vodna dozvola se daje na osnovu činjeničnog stanja utvrđenog pregledom dostavljene dokumentacije i izvršenim uviđajem na terenu, pod slijedećim uslovima:
 - 3.1. Da se upotreba i korištenje predmetnog pogona za preradu drveta vrši u skladu sa njegovom prirodom i namjenom te u skladu sa dostavljenom dokumentacijom i uslovima iz ove vodne dozvole.
 - 3.2. Da se prikupljanje i privremeno skladištenje piljevine i otpadaka od drveta iz procesa prerade vrši na način da se onemogući njegovo rasipanje po okolnom terenu.
 - 3.3. Da korisnik predmetnog objekta, za vrijeme trajanja ove vodne dozvole, obezbjeđuje da se tehnološke otpadne vode od pranja trupaca prikupljaju i odvođe do objekta predviđenog za tretman onečišćenih voda (dva taložnika), a zatim ovako tretirane vode ispuštaju preko okna za monitoring u rijeku Ljubinu.
 - 3.4. Korisnik poslovnog objekta je obavezan da izgrađene objekte, a čija svrha je odvođenje i prečišćavanje onečišćenih voda, redovno održava i koristi na način koji će obezbijediti njihovu potpunu ispravnost i funkcionalnost, kako bi se zadovoljio propisani kvalitet efluenta.
 - 3.5. Korisnik objekta je dužan, putem laboratorije ovlaštene od strane Federalnog ministarstva poljoprivrede, vodoprivrede i šumarstva po osnovu člana 64. stav (3) Zakona o vodama i Pravilnika o uslovima koje moraju ispunjavati ovlaštene laboratorije i sadržini i načinu izdavanja ovlaštenja («Službene novine Federacije BiH», broj 14/10, 14/3, 26/14, 15/17, 23/17 i 41/20), vršiti redovna ispitivanja kvaliteta otpadnih voda, uzimanjem uzorka efluenta iz kontrolnog okna, u skladu sa Uredbom o uslovima ispuštanja otpadnih voda u okoliš i sisteme javne kanalizacije («Službene novine Federacije BiH», broj 26/20, 96/20 i 1/24).
 - 3.6. Prečišćena otpadna voda mora ostati u maksimalno dopuštenim granicama definiranim Uredbom o uslovima ispuštanja otpadnih voda u okoliš i sisteme javne kanalizacije.
 - 3.7. Da se u skladu sa propisima iz oblasti zaštite okoliša vrši bezbjedno skladištenje i postupanje sa opasnim materijama i otpadom nastalim na predmetnom lokalitetu (adekvatnim mjerama onemogućiti bilo kakvo isticanje i rasipanje opasnih i štetnih materija na tlo i u vode).
 - 3.8. Da se nastali otpad na predmetnoj lokaciji - piljevina, drveni otpad, talog iz taložnika, kao i ostali otpad koji nastaje na predmetnom lokalitetu ne smije ni privremeno odlagati na česticu „vodno dobro“, odnosno u vodotoke i na njegove obale.
 - 3.9. Vlasnik odnosno korisnik objekta je obavezan pridržavati se svih mjera i uslova propisanih u saglasnostima i dozvolama izdatim od strane drugih nadležnih organa, a odnose se na korištenje i zaštitu voda i nisu u suprotnosti sa uslovima iz ove vodne dozvole.

4. Vlasnik, odnosno korisnik objekta je obavezan voditi propisne evidencije, te nadležnim organima dostavljati propisane obrasce (Obrazac EBS) u skladu sa Zakonom o vodama („Službene novine Federacije BiH“, broj 70/06) i Pravilnikom o načinu obračunavanja, postupku i rokovima za obračunavanje i plaćanje i kontrolu izmirivanja obaveza na osnovu opšte vodne naknade i posebnih vodnih naknada („Službene novine Federacije BiH“, broj 92/07, 46/09, 79/11, 88/12 i 03/16), Prilog 1, Poglavlje V – Određivanje koeficijenata zagađenja za zagađivače voda kod kojih se ne vrše direktna mjerenja voda tačka 22. tabele, te prema dostavljenim obrascima izvršavati u cjelosti i u propisanim rokovima obavezu plaćanja vodnih naknada. U slučaju izvanrednih situacija, havarijskih onečišćenja i drugih sličnih okolnosti, čime bi bio ugrožen kvalitet podzemnih i površinskih voda, korisnik objekta obavezan je izvijestiti nadležne organe i izvršiti izvanredna postupanja po nalogu nadležnih organa, te o vlastitom trošku uzroke štete otkloniti, a nastalu štetu nadoknaditi.
5. U periodu važenja ove vodne dozvole, pravno lice, odnosno korisnik objekta je dužan provoditi sve mjere i aktivnosti propisane istom.
6. U slučaju vanrednih situacija, havarijskih onečišćenja i drugih sličnih okolnosti, čime bi bio ugrožen kvalitet podzemnih i površinskih voda, vlasnik odnosno korisnik predmetnog objekta obavezan je izvijestiti nadležne organe i izvršiti vanredna postupanja po nalogu nadležnih organa, te o vlastitom trošku uzroke štete otkloniti, a nastale štete nadoknaditi.
7. Ukoliko usljed štetnog djelovanja voda nastalog zbog neizgrađenosti ili nedovoljne osposobljenosti (zaštitnih) vodnih objekata dođe do nastanka štete na predmetnom objektu sa pratećim sadržajima obuhvaćenim ovom vodnom dozvolom, korisnik zaštitnih vodnih objekata nije odgovoran za nastale štete.
8. Prava stečena po ovoj vodnoj dozvoli ne mogu se prenositi na treća lica, a ista prestaju u skladu sa odredbama Zakona o vodama.
9. Ova vodna dozvola, shodno članu 117. stav (1) Zakona o vodama se daje sa rokom važenja od 5 (pet) godina, od dana pravosnažnosti ovog rješenja.
10. Prije isteka važnosti ove vodne dozvole, Investitor, odnosno korisnik objekta je dužan da podnese zahtjev za izdavanje nove vodne dozvole.
11. Ovo rješenje o vodnoj dozvoli može se izmjeniti ukoliko za to nastupe razlozi utvrđeni u članu 130. stav (1) tačka 1., 2., 3. ili 4. Zakona o vodama, a zainteresirane stranke podnesu argumentiran zahtjev za izmjenju ovog vodnog akta.

Obrazloženje

Pravno lice «FAD» d.o.o. Sarajevo se pismenim zahtjevom obratio ovoj Agenciji za donošenje rješenja o vodnoj dozvoli za ispuštanje tehnoloških otpadnih voda u prirodni recipijent sa lokacije poslovnog objekta - pilane sa pratećim objektima, izgrađene na zemljištu označenom sa k.č. broj 2041/2 i 2041/1 K.O. Gora, Semizovac, općina Vogošća.

U provedenom postupku dostavljena je i pregledana slijedeća dokumentacija:

- Ovjerena kopija Rješenja o izmjeni podataka u sudski registar Općinskog suda u Sarajevu za subjekt upisa «FAD» d.o.o. Sarajevo, broj: 065-0-Reg-21-002007 od 06.07.2021. godine;
- Ovjerena kopija uvjerenja o poreskoj registraciji izdatog od Porezne uprave Federacije BiH-Kantonalni porezni ured Sarajevo, od 28.10.2014. godine;
- Ovjerena kopija Rješenja o odobrenju za obavljanje djelatnosti donesenog od strane Ministarstva privrede Kantona Sarajevo, broj: 07-04-18-3090/02 dana 07.02.2002. godine;
- Ovjerena kopija rješenja o vodoprivrednoj saglasnosti za izgradnju pilane sa pratećim objektima na lokalitetu Gora, općina Vogošća, donesenog od strane Ministarstva privrede Kantona Sarajevo, broj. 07-337-19 dana 18.11.1998. godine;
- Kopija katastarskog plana;
- Program monitoringa kvaliteta i kvantiteta otpadnih voda za 2024. godinu, urađen od strane „TQM“ d.o.o. Lukavac, juli 2024. godine;
- Opći akt o održavanju, korištenju i osmatranju vodnog objekta i postupanju u slučaju kvara ili havarije, urađen od strane Rudarsko-geološko-građevinskog fakulteta u Tuzli, juli 2024. godine;
- Projekat izvedenog stanja hidroinstalacija objekta pilane, urađen od strane Rudarsko-geološko-građevinskog fakulteta u Tuzli, juli 2024. godine;
- Dokaz o uplaćenju upravnoj i administrativnoj taksi.

Nakon izvršenog uvida u dostavljeni zahtjev i priloženu dokumentaciju utvrđeno je da su uz zahtjev dostavljeni potrebni prilozi, te je ovaj organ u skladu sa odredbama Zakona o upravnom postupku pokrenuo postupak u ovoj upravnoj stvari i u skladu sa članom 12. Stav (5) i (6) Pravilnika o sadržaju, obliku, uvjetima, načinu izdavanja i čuvanja vodnih akata («Službene novine Federacije BiH», br. 31/15, 55/19, 41/20 i 63/22), izvršen je obilazak predmetne lokacije i tom prilikom sačinjen zapisnik o uviđaju broj: UP-1/21-3-40-646-2/24 od 10.02.2025. godine.

Na osnovu pregleda dostavljene dokumentacije i izvršenog uviđaja na predmetnoj lokaciji utvrđeno je slijedeće:

Predmetna pilana sa pratećim sadržajima je izgrađena u ulici Gora broj 5 u Semizovcu, na zemljištu označenom kao k.č. broj 2041/2 i 2041/1 K.O. Gora, općina Vogošća, Sarajevo.

U sklopu pilane nalaze se slijedeći objekti: prostor – odlagalište trupaca, pilanska hala, objekat za finalnu obradu drveta, odlagalište rezane građe, kao i objekti prateće infrastrukture: kotlovnica, sušara, silos za smještaj pilote, manipulativne površine.

Pilana posjeduje pogon za preradu sirovih trupaca lišćara (hrast), proizvodnju rezane građe, broskog poda, lamperije i zidnih drvenih panela.

U procesu obrade drveta, kao i u toku proizvodnje drvene građe, voda će se koristiti samo za pranje sirovih trupaca (voda će se obezbijediti zahvatom iz rijeke Ljubine – nadležnost Kantona za davanje vodnih akata). Tretman otpadnih voda od pranja trupaca će se vršiti u betonskom taložniku (na dvije lokacije), a nakon taloženja će se vode, preko okna za monitoring, ispuštati u rijeku Ljubinu.

Proizvodnja potrebne toplotne energije ostvaruje se u postojećoj kotlovnici u sklopu predmetnog objekta. Kao ogrijevni medij koristi se drvena piljevina, sitni i krupni drveni ostaci iz proizvodnog procesa. Toplota proizvedena u kotlovskom postrojenju se koristi za grijanje prostorija objekata.

Razmatrajući podneseni zahtjev, a na osnovu dostavljene dokumentacije i uviđaja izvršenog na predmetnom lokalitetu, a u svrhu smanjenja negativnih uticaja predmetnog objekta i aktivnosti na stanje voda i vodni režim, podnosiocu zahtjeva su ovom vodnom dozvolom u dispozitivu ovog Rješenja, propisani uslovi u skladu sa odredbama Zakona o vodama, odredbama Uredbe o uslovima ispuštanja otpadnih voda u okoliš i sisteme javne kanalizacije i odredbama Pravilnika o sadržaju, obliku, uvjetima i načinu izdavanja i čuvanja vodnih akata.

Na osnovu provedenog postupka konstatuje se da je podnosilac zahtjeva, „FAD“ d.o.o. Sarajevo, ispunio minimum uslova za izdavanje vodne dozvole za ispuštanje tehnoloških otpadnih voda sa predmetne lokacije, te je riješeno kao u dispozitivu ovog rješenja.


Podnosilac zahtjeva je, na ime izdavanja ovog vodnog akta, izvršio uplatu federalne pristojbe iz tar. br. 43. Zakona o federalnim upravnim pristojbama i Tarife federalnih upravnih pristojbi («Službene novine Federacije BiH», br. 6/98, 8/00, 45/10 i 43/13).

Uputa o pravnom lijeku:

Protiv ovog rješenja može se uložiti žalba Federalnom ministarstvu poljoprivrede, vodoprivrede i šumarstva, u roku od 15 dana od dana prijema rješenja.

Žalba se podnosi neposredno pismeno ili preporučeno putem pošte ovom organu i taksira se sa 15 KM takse, prema tarifnom broju 3. Tarife federalnih administrativnih taksi.

Voditelj postupka: Aida Bezdrob, dipl.ing.građ.



Dostaviti:

- «FAD» d.o.o. Sarajevo, ul. Gora broj 5, 71 320 Vogošća
- (PRILOG: Projekat, Program monitoringa i Opći akt- dostavljeni uz zahtjev)
- AVP Sava, ISV – Vodna knjiga
- Sektor 50
- Sektor 40, arhiva
- Oglasna tabla AVP Sava Sarajevo